

A JE' JU'UNA', PACHIR CAJ U CA' TS'IBTA PABLO TI' TIMOTEO

2 TIMOTEO

Ts'ibta'b Timoteo ten Pablo

1 A teno' Pablojen tu tuchi'ten Jesucristo quir in tsec'tic u t'ʌn quire' tsoy tu t'ʌn C'uj ca' xiquen. Mʌ' ja wirej, binen quire' aro' quet yejer u t'ʌn uch. Caj ya'araj, ʌn to'on cuxtar munt q'uin quire' raji' Cristo Jesús. ²A je' ju'una' quin ts'ibtic tech Timoteo, quire' tech in jach yajech, in pararech. Mʌ' ja wirej, caj a wacsaj ta wor caj a wu'yaj in tsec't u t'ʌn C'uj rajen in pararech. Quin t'ʌnic C'uj ca' u yam tech soc u yajquintiquech. Quin t'ʌnic quir u qui'tar a wor soc mʌna' ba' ca tucric. Bayiri' quin c'atic ti' ic Jaj Ts'urirex Cristo Jesús xan.

**Cu tsicbar Pablo bic jach
tsoy a Cristoje'**

³Quin wac ti' C'uj: "Bayo'", quen ti' C'uj quin c'ujintiquech rajen jach tsoy in tucur. Baxuc xan in nunquir uch xan tu c'ujintajob C'uj rajen jach tsoy u tucurob in nunquir uch. Quin wac "bayo'" ti' C'uj quire' a tech Timoteojo' ta wacsaj ta wor.

Rajra' quin t'ʌnic C'uj tech. ⁴A teno' jach manan in c'at in ca' iric a wich tu ca'ten. Quire' in c'ʌ'omʌn caj a wac'taj a baj caj in p'ʌtech ich u cajar Efeso uch. Wa quin wiric a wiche', jach manan u qui'ir in wor tech. ⁵Mʌ' ja wirej, taj ta cʌn a wacsic ta wor ti' a chich Loida. Bayiri' ta cʌn a wacsic ta wor ti' a nʌ' Eunice. Robob jach taj tu yacsob tu yorob rajen tech xano' taj ta wacsaj ta wor xan.

⁶Rajen tan in c'asic tech soc mʌ' u tubur tech. Mʌ' a cha'ic u tupsic a wor quire' a wet acsʌ'orirob tu ca camsic ti'ob. Mʌ' ja wirej, tu ts'aja a beyaj C'uj uch. Ra' u q'uinin caj in ts'anc'ʌbtob tech ten yejer u jach ts'urirob tu cu c'ayob jeroj caj oquech ta beyaj ti' C'uj. Rajen chichquint a wor quir a beyaj ti' C'uj. ⁷Mʌ' ja wirej, wa quic ch'ic sajaquir ti' mac tu quic tsec'tic u t'ʌn C'uj aro' mʌ' ju tar ich C'uj. C'ʌ'otej u Taj'or u Pixam C'uj bin u ca' u chuquej to'on u muc'. Mʌ' ja wirej, a C'ujo' cu ts'ic to'on quir ic yajquintic tu cotor mac a

ju yaj C'uje'. A C'ujo' cu chuquic to'on u tsoyir soc c'ucha'an ij cor ma' jic man tu c'asir. ⁸Rajen ma' a yan ch'ic sajquir quir a tsicbar ti' u jer winic C'uj a mac ic Jaj Ts'urirex. Ma' ja ch'ic surquir ten Timoteo, quire' c'ara'anen tu cu ma'car winic. Ma' ja wirej, ma'ca'anen quire' tin tsec't u t'lan ic Jaj Ts'urirex. C'la'otej Timoteo, soc p'eri' ic muc'yaj quire' u jach tsoyir u t'lan C'uj. Ma' ja wirej, a C'ujo' cu chichquintic ij cor soc c'ucha'an ij cor ic muc'tej. ⁹C'la'otej Timoteo, a C'ujo', tu ta'co'on soc ij canic u t'lan. Ma' ju chen ta'co'on cax yirej tsoy ic beyaj. Ma' ju chen taco'on a C'ujo', cax yirej tsoyo'on. Tu chen taco'on quire' yan ba'wir to'on. Tu chen taco'on quire' u c'at u yamtic to'on Jesucristo, soc ma' jic bin ich c'ac'. A C'ujo' tu yajquinto'on tu ch'ic chunin uch cax mana' mac cax mana' yoc'ocab uch. Tu yajquinto'on quire' u parar C'uj a Jesucristojo'. ¹⁰A C'ujo', ma' tari te'ra' ich yoc'ocab hasta caj tarij ij cajtaquir ich yoc'ocab. Raji' Jesucristo, soc ma' ic bin quimin. Caj ij cu'ya u jach tsoyir u t'lan C'uj, caj ij cu'ya bic tabar ij cuxtar munt q'uin.

¹¹Ma' ja wirej, tu tetajen C'uj soc in bin in tsec't u t'lan ich tu cotor mac a ma' u winiquirob judío. Rajen tan in man in cams u t'lan ich a mac a ma' u winiquirob judío. ¹²Rajen Timoteo, caj u chucajenob ca' u ma'quenob tu cu ma'car winic. Rajen tan in muc'yaj baje'rer. Barej ma' jin ch'aj sajquir ti'i' cax quin muc'yaj. Quire' in jach er a mac a tin wacsaj tin wor a ti'o'. Rajen

in toc er c'ucha'an yor Jesús u canantic in pixam a tin c'ubaj ti'o' hasta tu q'uinin u yu'ur Cristo. Rajen tin wacsaj tin wor a ti'o'.

¹³Qui' canej u tajir t'lan C'uj a tin camsaj tech Timoteo, soc raji' ca wac'as camsic ti' u jer winic. Jach manan ca' a canej soc taj ca wacsic ta wor. Soc taj ca yajquintic winic quire' u pararech Cristo Jesús baje'rer. ¹⁴Canat u t'lan C'uj, a c'uba'an tech ten u Taj'or u Pixam C'ujo' uch. Ma' ja wirej, u Taj'or u Pixam C'uj cu cajtar tu yor a mac a tu quibaj u t'lan. Raji' cu bin u yam tech soc a qui' camsic ti' u jer winic.

¹⁵Ta toc u'yaj a jera' Timoteo. Tu cotor winic a yacsmānob tu yorob ich u ru'umin Asia caj u xump'atenob. Quet yejer Figelo yejer Hermógenes. ¹⁶Barej in c'at C'uj ca' u yajquinte Onesíforo yejer u bajob a ti' yanob tu yatoch Onesíforo, soc u yamta'r ti'ob. Ma' ja wirej, susu' caj tarij Onesíforo quir u chichquintej in wor tu c'ara'anen. Ma' ju ch'aj sujraquiri' cax tu yiren c'ara'anen tu cu ma'car winic. ¹⁷Caj c'uchij tu cajar Roma caj u sebquint u caxtiquen tu c'ara'anen. Caj u qui'qui' caxten hasta tu yiren. ¹⁸Quin t'lanic C'uj ca' yajquinta'c Onesíforo ten C'uj ca' bin c'uchuc tu q'uinin xur t'lan quire' tu tucren Onesíforo. C'la'otej Timoteo bic caj u yamto'on Onesíforo tu cajar Efeso uch. In wer a jach c'la'omān uch.

Ca' u canej bajen soldado ti' Jesucristo

2 A teche' in pararech Timoteo quire' caj a quib u t'lan C'uj caj

in tsec'tech uch. Ca' a cha'ej C'uj ca' u chichquint a wor quire' tu yamtech ca' a wacsej ta wor u t'An Cristo Jesús. Tu yamtajech quire' u yajech. ²C'ʌ'otej Timoteo, in t'An caj in tsec'taj uch ʌcatan ya'ab winic. A t'ʌno' a ta wu'yaj uch ca' a camsej ti' u jer winic, a mac a tu jach quib u t'An C'uj xan. A p'eri' yorobo' ti' u beyaj C'uj. Camsej ti'ob a tsoy yorobo' soc u ca' camsic ti' u jer winic. Camsej ti'ob a mac c'ucha'an yorob u wʌc'ʌs camsicob ti' u jer winic.

³A techo' Timoteo chichquint a wor quir a muc'yaj. Mʌ' ja wirej, ca' a muc'tej an bic u muc'tic soldado soc jach tsoyech u soldadojech Jesucristo. ⁴Mʌ' ja wirej, a mac a cu yocar soldado mʌ' ju bin yir u cor. Bayiri' a ba' ʌʌn tu yatoch. Quire' u c'at u qui'quintic u yor u jach ts'urir soldado. Baxuc to'on ti' ij Jaj Ts'urirex xan. ⁵Bayiri' xan a mac a cu chich acabo'. Ca' u qui' c'ʌne yacab an ten bic ts'iba'an tu ju'unin. Wa mʌ' ju c'ʌne yacab baxuco' mʌ' u chi' u jer a yet chich acabe'. Cax cu ʌʌn c'uchur ʌyber. Mʌ' ti' binij quir u c'ʌmic a ba' cu bin sijbir ti'. Baxuc to'on ti' ic Jaj Ts'urirex. Ca' ij quib u t'ʌn soc u qui' acsic to'onex. ⁶Ba'iri' xan, a mac a cu jach ʌʌq'uic a coro', quire' chich beyanʌjij tsoy ca' u ʌʌn bat'an jantej a ba' tu ʌʌc'aj. Cax mʌ' raji' ʌʌnin u cor. Tsoy u chan ber jantic. Baxuc to'on ti' ic Jaj Ts'urirex. Ca' chich beyanʌco'on ti' soc u ts'ic to'on a ba' u c'at C'uj soc ʌʌn ba' to'on ich ca'anan. ⁷Rajen qui' tucrej Timoteo a ba' quin wac tech. Mʌ' ja wirej, a Jaj Ts'ur C'ujo' bin u ca' yam tech

ca' a najtej tu cotor ba'. ⁸C'aj tech Timoteo ti' Jesucristo a ric'sa'b ich u quimrir ten C'uj quire' cuxa'an bajer. C'aj tech xan raji' u ch'ic mam a Davido' u nunquir Jesús. A Davido' raji' tu reyintaj tu ru'umin Judea uch. Baxuc tin tsec'taj ti' mac tu cotor quire' jach tsoy a je' t'ʌna'. ⁹Mʌ' ja wirej, quire' tin tsec'taj a je' u tsoyir u t'ʌn C'uj caj u chuquenob u winiquirob romano. Tan in muc'yaj quire' c'ʌra'anen tu cu ma'cʌr winic, iren a mac jach c'as. Cax c'ʌra'anen, u t'ʌn C'uj mʌ' c'ʌra'an. Tan u manob u jumintob u t'ʌn C'uj. ¹⁰Rajen tu cotor ba' quin muc'tic quir in yamtic a mac a yacsmʌnob tu yorob, quire' robob teta'b ten C'uj. A mac a yacsmʌnob tu yorob je' yiricob bic tabar in muc'tic, je' u chichtar u yorob. Tan in muc'tic soc p'eri'ob. A baywo', bin u ca' tacbirob rajen bin u ca' ʌybirob ten Cristo Jesús soc munt q'uin ti' ʌʌnob tu yicʌʌn. Robob bin u ca' u yamtob C'uj tu cu bin u reyintej C'uj.

¹¹A je' t'ʌn a quin ts'ibtic tech Timoteo jach taj. Rajen ca' ij cacsej tij cor ti'. U'yej ba' cu ya'aric tech:

Quet bayiri' quimo'onex yejer Cristo caj quimij ich cruz, baxuc cu yirico'onex C'uj. Quet bayiri' cuxa'ano'onex yejer Cristo, caj riq'uij, baxuc cu yirico'onex C'uj. ¹²Wa quic muc'yajex ti' u t'ʌn C'uj quic bin ic reyintiquex yejer C'uj. Wa quij cariquex mʌ' ij querex Cristo an ten bic ij cʌjtaquirex, baxuc xan bin u ca' ya'arej to'onex mʌ' yero'onex maco'onex xan

ca' bin xico'onex Δ catan C'uj.
¹³Wa to'onex tic p'uspachtex
 tu tij cacsajex tij corex, a ti'o'
 ma' ju p'uspachto'onex ma'
 biq'uin. Baxuc cu ya'aric C'uj.
 Ma' u c'ax u t'lan a C'ujjo' a ba'
 tu toc aro'.

Raji' irir jach tsoy ten C'uj

¹⁴Timoteo quen. C'asej ti'ob a ba'
 tin chich araj ti' u t'lan C'uj. Arej
 ti'ob wa Δ catan tu wich C'uj ma' ju
 nuncob u t'lan mac. Ma' ja wirej,
 aro' ma' ju yamtej mac quir u canic
 C'uj, cu chen choquintic u yorob a
 mac a cu yubicob u nunquicob u
 t'lan. ¹⁵Qui' sar a xiquin Timoteo ca'
 a qui' can u t'lan C'uj soc raji' C'uj
 cu bin u yac tech:

—Jach tsoyech Timoteo quire' ta
 qui' quibaj a ba' tin wa'araj tech.

Je' u yac tech aro' wa taj ca
 tsec'tic u t'lan C'uj a ba' jach taj.
 Rajen ma' a ch'ic suraquir ti' a
 beyaj. Rajen p'is a baj ta beyaj.
¹⁶Qui' canat a baj ti' a mac a
 cu nunquicob u t'lanob. Quire'
 t'lant'lanan u ca'ob. Baxuc u t'lanob
 quire' ma' ju sajto C'uj, rajen tan
 u manob ich c'as hasta cu wayar
 jach c'as. ¹⁷A ba' cu camscob ir
 a iq'uer u ca'o'. Ma' ju xur u man
 hasta ch'ejar mac. C'l'otej Himeneo
 yejer u rac'ob Fileto. Quire' irej
 iq'uer u ca' u camscob. ¹⁸Robob caj
 u p'atob u camscob u tajir u t'lan
 C'uj. Tan u camscob a ba' jach c'as,
 quire' yan jun yarob a yacsmnob
 tu yorob tu quibob a ba' camsa'bob.
 Ma' ja wirej, camsa'bob ts'oc u
 riq'uirob mac tu quimen. Caj u
 camsa'bob ma' u yan yan wac'as
 riq'uir mac tu quimen. Rajen a

maco' tu p'atob u t'lan C'uj. ¹⁹Chen
 ma' a ch'ic sajquir Timoteo, ti' a
 mac a cu tus camscob a ray t'lanob.
 Chichquint a wor, quire' a mac a cu
 yacsicob tu yorob ti' u t'lan C'uj ma'
 ju ch'ejar quire' caj u ya'araj C'uj.
 Ma' ja wirej, toc ts'iba'an ich u t'lan
 C'uj uch a cu ya'aric: "A C'ujjo' yer
 a mac a cu ya'aric: A teno' in wer
 Cristo. Rajen ca' u p'atej tu cotor
 u c'asi'." A baywo' C'uj yer mac tu
 quibaji'."

²⁰A to'onexo' a tij cacsex tij corex
 ti' yan ya'ab to'onex, barej u tiri' ti'
 ic beyajex. Ma' ja wirej, a to'onexo'
 iro'onex u rquir yo'och ich jach
 carem naj. Tu japnin naj cu c'lanicob
 u rquir a beta'b ti' oro wa beta'b ti'
 sac taq'uin. Ti' yan xan, cu c'lanicob
 u rquir a beta'b ti' c'at wa beta'b
 ti' che'. Yan u rquir cu c'lanicob u
 q'uinin cu chen qui' qui' janlanob.
 U tiri' u rquir a rajra' u c'lanicob.
²¹Rajen quin wac tech Timoteo,
 quire' tech ca camscob ti' u t'lan
 C'uj. Ma' a xactic a baj yejer a tus
 yajcamslajirob u t'lan C'uj, soc a
 C'ujjo' cu c'laniquech irech u rquir
 beta'b ti' oro. Ma' ja wirej, a C'ujjo'
 cu c'lanic a mac a tu ric'saj u baj
 ti' c'as soc ma' ju bin tu c'asir. Soc
 ca' bin c'uchuec tu q'uinin a C'ujjo'.
 Toc c'ucha'an yor quir u qui' beyaj
 ti' C'uj. ²²A techo' Timoteo soc
 baxuquech ca' u c'lanec C'uj. Ca' a
 p'at a ba' ca pachtic ta wor a c'aso'
 an ten bic mac ma' toy qui' xuruc
 u baquer cu pachtic c'as. Ca' a can
 u t'lan C'uj soc C'uj cu yamtiquech
 soc tsoy a wor. Ca' a canej u t'lan
 C'uj soc ma' a p'usic mac. Ca' a can
 u t'lan C'uj soc a yajquintic tu cotor
 mac. Ca' a yajquintej C'uj, soc taj

ca wacsic ta wor. Caxtej u qui'tar a wor an ten bic a taj tu yacsaj tu yor u t'an C'uj, a mac a cu t'anicob C'uj. ²³MΛ' a yΛn nunquic u t'Λn a mac a mΛ' tu cΛnicob C'uj. Quire' mΛ' yer ba' u c'at C'uj. Ca wiric cu chen nunquicob t'Λn, a cu p'usicob yorob mac. ²⁴C'Λ'otej Timoteo a mac a cu beyaj ti' C'uj mΛ' ju nunc u t'Λn mac. MΛ' ja wirej, tsoy cu t'anic tu cotor mac. Bayiri' xan, nema' biqui' tu cu camsic u t'Λn C'uj. MΛ' seb cu choquintic u yor mac. ²⁵Raji' chanber cu tajquintic a mac a mΛ' ju c'ΛmΛn u t'Λn C'uj. Ca wiric, mΛ' ij querex wa C'uj cu cha'bar u c'axicob yorob soc u jawarob u si'pirob quir u yacsicob tu yorob. ²⁶Jaj ix tΛco wa cu jepsicob yorob ti' a mac a tabsa'b ten quisin uch, soc yerob c'ana'an ten quisin aro'. Soc u tocar ten C'uj.

Bic tabar a winico' ca' bin c'uchur tu q'uinin xur t'Λn

3 C'Λ'otej a ba' quin wac tech Timoteo. Ra' u q'uinino' tabar u xur t'Λn jach pajar u muc'yajob cu bin yubejob. ²Ra' u q'uinino' ya'ab mac cu chen bin u cΛxt u taq'uinob. Cu chen bin u cΛxt a ba' cu qui'quinticob u yorob. U wΛc'Λs bajiri' cu chen tucric mΛ' ju tucrej C'uj. A baywo' rajra' yacob mun u ya'abir u ba'tac yΛn a ti'obo'. MΛ' ja wirej, u c'at ca' u tubsej yorob a mac a mΛna' u ba'tΛcob. Seb cu bin u p'asticob C'uj, baxuc xan bin u ca' p'asticob yet xibir xan. ³MΛ' ju bin yub u t'Λn u nΛ' mΛ' ju bin yub u t'Λn u tet xan. MΛ' ju bin ya'arej: "Bayo'." Rajra' u ts'icob quire' mΛ' yacsmanob tu yorobi'. MΛ' ju bin

yajquintob mac. Chen choc yorob, chen ama'an u sistar yorob. Seb cu paq'uicob u pach u jer. MΛ' ju c'uchur u yorob u ma'quinticob a ba' c'asir cu pachticob. MΛ' ju bin u yajquintob a ba' tsoyo'. MΛ' qui' yorob yiricob a mac jach tsoyo'. Seb cu bin c'uchurob mac soc u quinsa'rob. ⁴MΛ' ju tucrob a ba' cu tsicbarobo' baxuc a ba' cu yiricob. Cu chen tucricob tu yorob: "Jach caremenob", quij, cax mΛ' caremobi'. Cu chen pachticob tu yorob a c'aso', chen mΛ' ju bin u yajquintob C'uj. ⁵Wa mac cu yiricobe' cu tus c'ujinticob C'uj. Barej mΛ' ju quibob C'uj.

Barej mΛ' ja manob Timoteo yejerob. ⁶A baxuco' a ra' u q'uinino', je' u tar mac quir u tabsa'r mac. Bin u ca' manob u tus camsicob u t'Λn C'uj soc u tus acsic tu yatoch xquic. Rajen cu tus camsicob ba' soc u quibicob xquic a mΛ' chich u yorobo'. Ca wiric a xquico' jach chich u jo'rob. A je' xquica' u jach ts'urir u c'asir a cu pachticob tu yorobo'. Rajen jach yΛn u si'pirob. ⁷A je' xquica', rajra' u chen c'at u cΛnicob u t'Λn a ba' tsoy tu xiquinob. Yubicob rajen mΛ' ju c'Λmob u t'Λn C'uj a ba' jach tajol. MΛ' ju c'uchur yorob ti'. ⁸C'Λ'otej Timoteo tu q'uinin a ti' yΛn ic nunquir Moisés uch. YΛn ca'tur xib, a tu p'astob Moisés xan uch. Janes u c'aba' turiri', yejer u jer u c'aba' Jambres. Baxuc xan a yajtus camslΛyΛjirob a tin wa'araj tech, caj u p'astob u jach tsoyir u t'Λn C'uj. A je' u tus ΛjcamsΛyΛjirob jach manan c'asir u tucurob. MΛ' ja wirej, Timoteo, tu tus acsob tu yorob u

t'ʌn C'uj. ⁹C'aj tech uch Timoteo, ba' u berob ti' Janes yejer Jambres a caj u p'astob Moisés? Caj irir ten tu cotor u winiquirob judío mʌ' c'uchij yorob ti' Moisési!. Ra'iri' cu bin yirob tu cotor mac bic tu tusarob ti' mac a tus yajcamsʌyʌjirob tu yʌnech. Tabar yiricob tu cotor mac a tus yajcamsʌyʌjirob mac.

Pablo caj u chich araj ti' Timoteo

¹⁰Chen a techo' Timoteo, caj a c'ʌm u t'ʌn C'uj a tin camsech uch. Tan a qui' quibic a techo'. Ta wiraj bic tabar in cuxtar tu yʌnech uch. Ta wiraj bic caj in p'is in bʌj tin beyaj. Ta wiraj bic caj in wacsaj tin wor. Ta wiraj mʌ' jin bʌbʌ p'ʌte in beyaji!. Tech ta wira nema' biqueni!. Tech ta wira caj in yajquintaj tu cotor mac. ¹¹Tech ta wiraj quire' tin tsec'taj u t'ʌn C'uj ti' yʌnech caj u chucob in pach. A techo' Timoteo, ta wiraj ba' in ber a teno' ich u cajar Antioquia yejer u cajar Iconio yejer u cajar Listra. A wer jach manan tu chucob in pach. Barej tu taquen Jaj Ts'ur. ¹²C'ʌ'otej a je' t'ʌna'. A mac a jach manan u c'at u qui' cʌnej C'uj soc u qui' sayʌr tu pach quir u cʌnic u t'ʌn Jesucristo. Je' u muc'yajtique', quire' bin u ca' chucbirob u pach ten u rac'ob. ¹³Barej a mac jach c'aso' yejer a mac u tusarbaro', bin u ca' man tu c'asir hasta jach manan u c'asirob. A mac cu tusaricob, u wʌc'ʌs bʌjiri' cu yʌn bin tusarbir ti'.

¹⁴Barej u'yej bar quin wac tech Timoteo. Ca' a chichquint a wor a ba' ta cʌnaj. Ta toc acse ta wor ti', quire' taj aro'. Quire' a wer mac tu camsech uch a tsoy yoro'. ¹⁵Quire'

toc chichanech caj a cʌnaj u t'ʌn C'uj, rajen a ne'er u t'ʌn C'uj quire' caj a quibaj u t'ʌn Jesucristo caj. Mʌ' ja wirej, u t'ʌn C'uj a ts'iba'ano', c'ucha'an yor u camsic mac soc u quibic soc u yacsic tu yor ti' Cristo Jesús. ¹⁶C'ʌ'ot a jero' Timoteo. Tu cotor a ba' yarmʌn C'uj ti' ts'iba'an ich u t'ʌn C'uj soc u camsic'on a ba' ca' ij quibej. Ti' ts'iba'an quir ij c'axic ij cor. Ti' ts'iba'an quir u chich aric to'on soc ic man tu tsoyir. Ti' ts'iba'an quir u chich aric to'on soc mʌ' jic bin tu c'asir. ¹⁷A C'ujo' tu ts'aj to'on u t'ʌn, soc c'ucha'an ij cor ic beyaj ti' C'uj. Rajen ic ne'er ba' u c'at C'uj soc ic man tu cotor tu tsoyir.

4 Rajen quin chich aric tech Timoteo quire' C'uj cu yiric baxuc Jesús cu yiric xan. Quire' ra' cu bin tar biq'uin quir yiric a mac yʌn u si'pir wa mʌna' u si'pir. Je' yiric a maco' cuxa'ano' bayiri' a mac a quimeno'. Quire' a wer Timoteo, ca' bin uruc Jesús jeroj bin u ca' u reyintej ich yoc'ocob. ²Rajen ca' a tsec't u jach tsoyir u t'ʌn C'uj. Cax ra' u q'uinin tsoy yubic mac cax mʌ' ra' u q'uinin u c'at yub a t'ʌn. Chichquint a wor a wac ti'ob, soc a wesic a ba' si'pir yʌn ti'obe' quir u ya'aric ti' C'uj ca' jawsac u si'pir ten C'uj. Chich a wac ti'ob ca' u p'ʌtob a cu pʌyic u si'pirob ca' a chichquint yorob a mac a cu quibicob u t'ʌn C'ujo'. Jach nema' biquech ca' a camsej ti'ob u t'ʌn C'uj soc u cʌnicob. ³Je' u c'uchur tu q'uinine' a winico', mʌ' u c'at yub camsa'r u tajir u t'ʌn C'uj. Bin u caj manob u cʌxtob u jer ya'ab yajcamsʌyʌjirob hasta

cu yubicob tsoy u camsa'r. M^a ja wirej, u c'atob yubob camsa'r a ba' cu pachticob tu yorobo'. ⁴Je' u p'uspachticob u jach tsoyir u t'lan C'uj soc u saricob u xiquinob, a ba' camsa'b ten u nunquir ucho'. Rajen chen t'lan u ca'ob uch. ⁵Barej a techo' Timoteo, qui' canant a pixam tu cotor ba' a cu bin taro'. Ca' a muc'tej wa cu tar u chuquicob a pach. Quire' ra' a beyaj a techo', quir a tsec'tic u jach tsoyir u t'lan C'uj. Qui' tsec't u t'lan C'uj, soc tu cotor mac yer bic tabar u taquicob u baj.

⁶Tabar in quinsa'r an ten bic quinsbir y^lac' a cu sijic ti'ob C'uj^o. C'uchij tu q'uinin in quinsa'r ti' u yajir u beyaj C'uj. ⁷Ts'oc in beyaj. Tin qui' quibaj tu cotor a ba' yaraj ten C'uj uch. ⁸Rajen m^a in p'at in wacsic tin wori'. Baje'rer quire' cu yiric taj tin quibaj a Jesús^o, soc u ts'ic ten u bo'orir tu manen tu tsoyir. Ra' cu bin ts'a ten ca' bin xuruc t'lan, quire' taj cu yiric ba'quiri' yan to'on. M^a chen ten cu bin ts'a'bari'. Baxuc bin u ca' u ts'a'bar ti' a mac a tan u qui' pajic u q'uinin ca' bin uruc Jesús.

Ts'oc u t'lan Pablo ti' Timoteo

⁹Ca' taquech tin wicnan. Seb a tar. ¹⁰Quire' tu xunp'aten Demas. M^a ja wirej, raji'o' caj u yajquint a ba' yan tera' yoc'ocob, rajen caj puts'ij ich u cajar Tesalónica. Bin Crescente ich u ru'umin Galacia. A Titojo', bin tu ru'umin Dalmacia. ¹¹Chen ti' yan tin wicnan Lucas. Ca' bin taquech, toc payej Marcos xan, quire' c'ucha'an yor u yamtiquen tin beyaj. ¹²Tin tuchi'taj ca' xic

Tíquico ich u cajar Efeso. ¹³Ca' bin taqueche', toc ch'a a pure ten u ca' yarir in noc', a tin p'at^aj quire' tubten ich yatoch Carpo ich u cajar Troas. Baxuc a ju cuchij in ju'une' in xaquic yejer u ju'unin a jin cats'mane'. A je' ju'una' a jin nec'ate'.

¹⁴A Alejandrojo' a mac yer a beta'r mascabo'. Tu jach c'asquinten. Chen a C'uj^o raji' cu bin u bo'otic u bo'orir u c'ab quire' c'as tu betaj.

¹⁵A techo' Timoteo, qui' canant a baj ti' Alejandroj xano'. Quire' tan u jach p'actic a ba' quij camsique'.

¹⁶Ra' u q'uinin, caj u yan bat'an 'uyij in t'lan tu cu ta'quicob in jo'r acatan u rey u winiquirob romano. M^{ana} in bajjob tar u yamten quij. Tu rac p'atenob tin junan. Quin t'lanic C'uj ca' jawsac u si'pirob a mac a tu p'atenobo'. ¹⁷Barej ic Jaj Ts'urirex p'at tin wicnan tan u chichquintic in wor. Rajen c'ucha'an in wor in bin in tsec'tic tu cotor u t'lan C'uj acatan a mac a m^a u winiquirob judío ca' yubob. Rajen tu taquen soc m^a u puricob u chi'en barum. ¹⁸Caney a jeroj, Timoteo. Ic Jaj Ts'urirex bin u ca' taquiquen ti' a mac a ju c'at u c'asquintiquenob ten. Bin u ca' u cananten hasta quin c'uchur tu ru'umin tu cu bin reyintic C'uj ich ca'anan. Rajen quin wac ti': "Jach caremech C'uj." Raji' quin bin in wac ti' munt q'uin. Jeroj.

Cu chen t'lanic u bajjob Pablo

¹⁹Quin t'lanic Prisca yejer u mam Aquila u tiriri' yan, bayiri' a mac ti' yan tu yatoch Onesíforo. ²⁰A Erastoe' ti' p'at u cajar Corinto. Yajij Trófimoj

rajen p'at tu cajar Mileto. ²¹Wa ber ca' bin taquech tin wicnλn, mλ' a yλn tar u q'uinin que'er. Ya'araj Eubulo ca' in t'λnech. Baxuc Pudente yejer Lino yejer Claudia yejer tu cotor ic bajobex.

²²Quin t'λnic ic Jaj Ts'urirex Jesucristo ca' u qui' cλnantech tub yλnech. Bayiri' quin c'atic ti' C'uj ca' u yamtej tu cotor mac tub yλnech. Jeroj, ts'oquij, quiij Pablo.